

佛說希有校量功德經

隋北天竺三藏法師闍那崛多譯

如是我聞一時佛在舍衛國祇樹給孤獨園爾時長老阿難比丘在蘭若處獨坐思惟作如是念諸善男子及善女人若能受持三歸依處作如是言我今歸依佛歸依法歸依僧得幾所功德生是念已長老阿難日初出時於其住處即從座起齊整衣裳安庠而出往詣佛所到佛所已頂禮佛足偏袒右肩右膝著地合掌向佛而作是言世尊我於向者在空閑處如是思惟若善男子及善女人能如是言我今歸依佛歸依法歸依僧得幾所功德我實未解惟願如來分別演說令諸衆生得正知見爾時世尊告阿難言善哉善哉汝善男子真實智慧微妙能善思量能問如來

如斯之義如汝思量彼善男子及善女人若能清淨發如是心我今歸依佛歸依法歸依僧得幾所功德者諦聽諦聽善思念之吾當爲汝分別解說阿難白佛唯然世尊願樂欲聞爾時世尊告阿難言此閻浮提地縱廣七千由旬形如車廂南陬北廣假使滿中須陀洹人譬如竹葦甘蔗稻麻如是一切須陀洹人其有善男子善女人滿一百年持於世間一切所有娛樂之具盡給施與復以四事具足供養恭敬禮拜乃至滅度之後收其舍利起七寶塔一一塔廟皆以香華酥油燈燭作倡妓樂繒綵幡蓋種種供養於汝意云何彼善男子善女人得福多不阿難白佛甚多世尊佛言阿難不如是善男子善女人以淳淨心作如是言我今歸依佛歸依法歸依僧所

得功德於彼福德百分不及一千分不及一百千萬分不及一乃至算數譬喻所不能及爾時世尊復告阿難且置閻浮提假使西瞿陀尼縱廣八千由旬其地形狀猶如半月皆悉滿中斯陀舍人譬如竹葦甘蔗稻麻若有善男子善女人滿二百年復以世間種種四事供養如前乃至滅度之後收其舍利起七寶塔一一寶塔亦以華香燈燭妓樂繒蓋幢幡種種供養於汝意云何彼善男子善女人得福多不阿難白佛甚多世尊佛言阿難不如是善男子善女人以淳淨心作如是言我今歸依佛歸依法歸依僧所得功德於彼福德百分不及一千分不及一億分不及一百十億分不及一乃至算數譬喻所不能及爾時世尊復告阿難且置一閻浮提一瞿陀尼

假使東弗婆提縱廣九千由旬其地形狀猶如滿月皆悉滿中阿那舍人譬如竹葦甘蔗稻麻若有善男子善女人滿三百年復以四事一切樂具供養如前乃至滅度之後收其舍利起七寶塔一一寶塔皆以華香妓樂幡蓋種種供養於意云何彼善男子善女人得福多不阿難白佛甚多世尊佛言阿難不如是善男子善女人以淳淨心作如是言我今歸依佛歸依法歸依僧所得功德於彼福德百分不及一千分不及一百千億分不及一億分不及一百億分不及一百千億分不及一乃至算數譬喻所不能及爾時世尊復告阿難且置一閻浮提一瞿陀尼一弗婆提假使北方鬱單羅越縱廣十千由旬其地形狀四方端直周匝齊整滿中阿羅漢諸漏已盡無

復煩惱心得自在具正解脫正智得解脫其
心調伏人中太龍所作已辦捨棄重擔逮得
自利不受後有梵行已立身心無礙達衆生
意得六神通具八解脫譬如竹葦甘蔗稻麻
若有善男子善女人滿四百年復以四事供
養恭敬一切樂具給足如前乃至滅度之後
起七寶塔一一寶塔皆以華香妓樂燈燭繒
蓋幢幡種種供養於意云何彼善男子善女
人得福多不阿難白佛甚多世尊佛言阿難
不如是善男子善女人以淳淨心作如是言
我今歸依佛歸依法歸依僧所得功德於前
福德百分不及一一分不及一百千分不及
一百千億分不及一乃至算數譬喻所不能
及爾時世尊復告阿難且置閻浮提瞿陀尼
弗婆提鬱單羅越假使徧四天下滿中辟支

佛獨覺譬如竹葦甘蔗稻麻若有善男子善
女人滿十千年復以四事供養恭敬一切樂
具給足如前乃至滅度之後收其舍利起七
寶塔一一寶塔皆以華香妓樂燈燭繒蓋幢
幡種種供養於意云何彼善男子善女人得
福多不阿難白佛甚多世尊佛言阿難不如
是善男子善女人以淳淨心作如是言我今
歸依佛歸依法歸依僧所得功德於前福德
百分不及一一分不及一百千分不及一百
千億分不及一乃至算數譬喻所不能及爾
時世尊復告阿難且置一四天下一日月光
所照之處設復一千世界所謂一千日月一
千四大海水一千須彌山王一千閻浮提一
千瞿陀尼一千弗婆提一千鬱單羅越一千
四天王天一千三十三天一千夜摩天一千

珊兜率陀天一千化自樂天一千他化自在
天一千梵天不相繫屬各於千世界中得大
自在阿難是名一小千世界阿難從一小千
世界一一數之滿一千已是名中千世界阿
難從中千世界復一一數還滿一千是名大
千世界阿難如是合數總名三千大千世界
假使滿三千大千世界中諸佛如來譬如竹
葦甘蔗稻麻彼等諸佛世尊至真等正覺若
有善男子善女人二萬歲中常以一切娛樂
之具衣服飲食牀卧湯藥種種奉施乃至滅
度之後收其舍利起七寶塔一一寶塔皆以
華香妓樂繒蓋幢幡香燭油燈如是供養於
意云何彼善男子及善女人得福多不阿難
白佛甚多世尊佛告阿難若復有人直能供
養一佛世尊供滿二萬歲四事具足供養恭

敬乃至滅度收其舍利起七寶塔一一寶塔
皆以華香妓樂繒蓋香油燈燭一切奉施其
福尚多無量無邊不可稱數何況滿三千大
千世界諸佛如來二萬歲中常以四事供養
供給乃至滅度收其舍利起七寶塔一一寶
塔各以華香妓樂繒蓋及香油燈種種所須
悉皆供養實得無量無邊不可算不可數福
德之聚佛言阿難猶不如是善男子善女人
以淳淨心作如是言我今歸依佛歸依法歸
依僧所得功德勝前福德百倍千倍萬倍不
可算數言辭譬類所能知及爾時世尊復告
阿難若有人能歸依佛竟歸依法竟歸依僧
竟乃至一彈指頃能受十善受已修行以是
因緣得無量無邊功德阿難若復有人能一
日一夜受八戒齋已如說修行所得功德勝

前福德千倍萬倍百千萬倍乃至算數譬喻所不能及阿難若能受持五戒盡其形壽如說修行所得功德勝前福德百倍千倍萬倍千億萬倍非算數譬喻所能知及阿難若復有人受沙彌戒沙彌尼戒復勝於前百倍千倍萬倍千億萬倍非算數譬喻所能知及阿難若復有人能受持式叉摩那戒又復所得功德勝前福德百倍千倍百千萬倍乃至算數譬喻所不能及何況受持比丘尼戒依波羅提木叉如說修行況復有人盡形受持大比丘戒依波羅提木叉戒如說修行不缺不犯無有穢濁清淨梵行得無量無邊功德勝前百倍千倍萬倍百千萬倍乃至算數譬喻所不能及爾時長老阿難聞佛說此三歸依處乃至盡壽護大比丘波羅提木叉功德無

量歎未曾有白佛言甚竒世尊是經微妙不可思議明甚深義功德廣大難可格量當何名此經我等云何奉持佛告阿難此經名爲希有希有經汝當奉持所以者何是經中說希有之法所演勝法一切世間難聞故名希有佛說是經已長老阿難聞佛所說歡喜奉

佛說希有校量功德經

音釋

報	日	大	王	瑳	鹽
殺	殺	斧	伐	切	呼
壯	公	也	切	何	鷄
羊	戶				彪
也	切	腎	古	都	悲
撞	緊	也	注	郎	幽
短	切		切	也	切
矛	昌	耒		充	翡
也	容	耒		戟	翠
切	切	耒		紀	翡
頰	古	耒		逆	翠
面	協	耒		切	鳥
旁	切	耒		稍	名
也	切	耒		切	切
概	居	耒		角	蹠
切	致	耒		切	之
綢		端		錢	石

